

# Kerajaan, swasta perlu pengurusan cekap – PM

Um- 13/2/2007

KUALA LUMPUR 12 Feb. – Negara membangun perlu mengambil langkah lebih efektif bagi memastikan pengurusan yang lebih cekap dan beretika dalam sektor kerajaan serta swasta.

Perdana Menteri, Datuk Seri Abdullah Ahmad Badawi berkata, etika dan ketelusan merupakan ciri utama yang dinilai oleh para pelabur global sebelum mereka membuat keputusan mengenai pelaburan masing-masing.

“Oleh itu, setiap negara terutama negara-negara membangun perlu mengambil langkah berkesan bagi memastikan kesemua prinsip itu didukung,” katanya dalam perutusan pada buku cenderamata sempena Forum Dunia Etika dan Ketelusan, di sini hari ini.

Forum dua hari yang bermula hari ini dianjurkan oleh Institut Strategi dan Kepimpinan Asia (ASLI) dan Transparency International Malaysia (TIM) dengan sokongan Caux Round Table.

Menurut Abdullah, Malaysia memberi keutamaan dalam membentuk nilai, etika dan moral yang baik de-

ngan melancarkan Pelan Integriti Nasional (NIP), yang menyediakan arah serta garis panduan bagi semua sektor tentang kaedah untuk meningkatkan tahap integriti.

Jelas Perdana Menteri, kajian juga sedang dijalankan berhubung kurikulum sekolah dan universiti bertujuan mewujudkan nilai serta pembentukan moral pada tahap yang lebih baik.

Ujarnya, pendekatan tersebut merupakan satu cara bagi memastikan generasi muda diberi peluang untuk belajar membuat pilihan berhubung moral dan dilema etika yang akan dihadapi oleh mereka kelak.

Dalam pada itu, Abdullah turut menggesa para peserta forum tersebut supaya terus membina idea yang telah dibincangkan dan melaksanakannya di pertubuhan dan bidang masing-masing.

“Hanya dengan bekerjasama, kita boleh mencapai wawasan yang kita kongsi untuk membentuk sebuah masyarakat yang mengamalkan tadbir urus yang baik serta mendukung nilai etika, integriti dan ketelusan,” katanya.